

CONVOCATORIA DE BOLSAS PARA OS ESTUDOS DE MÁSTERES UNIVERSITARIOS OFICIAIS NA UNIVERSIDADE DA CORUÑA, CURSO 2024/25

1. OBXECTO DAS BOLSAS

A Universidade da Coruña (UDC) e o Banco Santander convocan **70 bolsas** para o alumnado matriculado nun Máster Universitario Oficial da UDC no curso académico 2024/25, a tempo completo, segundo os requisitos que establece esta convocatoria.

2. DOTACIÓN, CONTÍA E PAGAMENTO

1. Os fondos destinados a estas bolsas serán dun total de **70.000 €**, financiados polo Banco Santander dentro do convenio coa UDC. Irán con cargo á partida orzamentaria 030A 422D 48000 – Proxecto nº 1182.
2. A contía bruta de cada bolsa será de 1000 €.
3. O pagamento efectuarase mediante transferencia á conta do Banco Santander indicada polo/a alumno/a, da cal deberá ser titular, seguindo as indicacións que consten na resolución definitiva da convocatoria.

3. REQUISITOS DAS PERSOAS SOLICITANTES

Pode solicitar a bolsa o alumnado que cumpra os seguintes requisitos:

- a) Estar matriculado, no curso 2024/25, na Universidade da Coruña, a tempo completo, nun mínimo de 60 créditos en primeira matrícula, nalgún dos Másteres Universitarios oficiais; e ao corrente do pagamento dos prezos públicos.

As materias ou créditos recoñecidos, validados, adaptados ou transferidos non se terán en conta para o cumprimento destes requisitos.

- b) Os estudantes estranxeiros non comunitarios deberán acreditar a condición de **residentes**, de conformidade co disposto na normativa sobre dereitos e liberdades dos estranxeiros en España.

4. CRITERIOS DE SELECCIÓN

1. As bolsas adxudicaranse de acordo coa nota de acceso ao Máster das persoas solicitantes, segundo a nota media do expediente da titulación que lle deu acceso ao Máster, en base 10.
2. Aplicaranse á dita titulación os seguintes coeficientes correctores: 1,17 cando a rama da titulación sexa Enxeñaría e Arquitectura, 1,11 cando a rama da titulación sexa Ciencias e 1,05 se a rama é Ciencias da Saúde.
3. No caso de empate, aplicaranse os seguintes criterios: menor número de suspensos; se o empate persiste, maior número de matrículas de honra; e se o empate aínda persiste, maior número de sobresaíntes, na titulación de acceso ao Máster.

5. SOLICITUDES, DOCUMENTACIÓN E PRAZO

O alumnado que reúna os requisitos esixidos nesta convocatoria, deberá tramitar a solicitude da bolsa, segundo o seguinte procedemento:

1. Presentar a solicitude enchendo o formulario en liña ao que se accede a través da seguinte dirección web:

https://www.udc.es/sape/bolsas_axudas_premios/bolsas-master-udc-santander/

2. Rexistrarse na plataforma de bolsas do Banco Santander, na convocatoria específica para estas bolsas. Deberán indicar obrigatoriamente o número de expediente que se lles comunicará no correo electrónico que recibirá na súa conta de correo @udc.gal, tras presentar a solicitude tal e como se indica no punto 1, a través da dirección web:

<http://app.santanderopenacademy.com/program/univ-coruna-estudios-masteres-universit-oficiales-2024-25>

No momento da solicitude deberá cubrir unha **Declaración de responsabilidade** de que cumpre todos os requisitos establecidos nesta convocatoria.

O procedemento é integramente telemático.

Todas as persoas solicitantes deberán subir á aplicación indicada no punto 1:

https://www.udc.es/sape/bolsas_axudas_premios/bolsas-master-udc-santander/

- a) DNI en vigor. No caso de cidadáns doutros países: Documento de Identificación de Estranxeiros (**NIE**). **Non será válida a solicitude con pasaporte**. Os estudantes estranxeiros non comunitarios deberán acreditar a súa condición de **residentes**.
- b) O xustificante do pagamento dos prezos públicos de matrícula do curso 2024/25.
- c) A certificación dos estudos de Grao que lle deron acceso ao Máster, calculada en base 10.

No suposto de titulacións obtidas no estranxeiro, ademais do certificado do expediente académico, no que conste a cualificación mínima aprobatoria, deben presentar firmado o documento de declaración de equivalencia das notas medias de estudos realizados aos correspondentes españois, que se realizará en liña a través da sede electrónica do Ministerio de Educación, Formación Profesional e Deportes:

https://universidades.sede.gob.es/pagina/index/directorio/Equivalencia_notas_medias

Poderá requírirselle ás persoas solicitantes a exhibición da documentación orixinal.

O prazo de presentación das solicitudes estará aberto dende o día hábil seguinte ao da publicación desta convocatoria na Sede Electrónica da UDC **ata as 23:00 h do 20 de decembro de 2024**.

6. INCOMPATIBILIDADES

1. Estar en posesión dun título de Máster Universitario oficial, ou en disposición de acadalo.
2. Ter sido beneficiario/a dunha bolsa/axuda para cursar estudos de Máster Universitario oficial en cursos anteriores, ou no curso 2024/25, financiada con fondos públicos ou privados (plan propio UDC; Ministerio

de Educación, Formación Profesional y Deportes; Xunta de Galicia; BEME...).

3. Percibir salarios que impliquen calquera vinculación contractual ou estatutaria da persoa bolseira, ou calquera tipo de ingresos percibido pola prestación de servizos profesionais ou a realización de traballo remunerado, cando supoñan a obtención de ganancias superiores no seu importe ao trinta por cento do Salario Mínimo Interprofesional no curso académico.

4. Encontrarse nalgunha das circunstancias sinaladas no artigo 13.2 da Lei 38/2003, do 17 de novembro, xeral de subvencións.

5. Estar gozando dun Programa de Mobilidade no curso 2024/25.

7. OBRIGAS E INCUMPRIMENTO DAS PERSOAS BOLSEIRAS

A persoa beneficiaria deberá manter a matrícula activa todo o curso académico 2024/25. No caso de incumprimento das súas obrigas ou renuncia, a persoa bolseira deberá reintegrar a cantidade percibida.

As persoas bolseiras están obrigadas a comunicarlle á Vicerreitoría de Estudantes e Empregabilidade a renuncia á bolsa tan pronto como se produza a causa que a determine. As baixas que se produzan serán substituídas pola seguinte persoa solicitante que figure na listaxe de agarda, se a houbese.

8. COMISIÓN DE SELECCIÓN

A Comisión de Selección estará composta polas seguintes persoas:

- a) Presidenta: María José Lombardía Cortiña, vicerreitora de Estudantes e Empregabilidade
- b) Secretaria: María Dolores Fernández Vázquez, xefa de Sección de Bolsas
- c) Vogal 1: José Luis Añón Teijido, Adxunto á Vicerreitoría de Estudantes e Empregabilidade
- d) Vogal 2: Belén Vidal Seoane, xefa do Negociado III do Servizo de Estudantes
- e) Vogal 3: Irene Rodríguez Ríos, representante dos estudantes

A Comisión está facultada para resolver calquera dúbida relacionada con esta convocatoria.

9. RESOLUCIÓN E PUBLICACIÓN

1. Unha vez que remate o proceso de avaliación das solicitudes, publicaranse no Taboleiro Electrónico Oficial da UDC (TEO) a listaxe provisional de persoas con bolsa concedida e denegada, neste último caso coa mención da causa da denegación, e a listaxe de agarda se a houbese, no caso de existir renuncias.

2. As persoas interesadas poderán presentar alegacións e/ou a documentación necesaria para emendar erros no prazo de cinco días hábiles, contados a partir do día hábil seguinte ao da publicación da resolución no TEO.

3. Unha vez revisadas as alegacións e a documentación pola Comisión de Selección, publicarase unha resolución que conterà a listaxe definitiva de persoas beneficiarias das bolsas, así como a listaxe de agarda, se a houbese.

As persoas adxudicatarias da bolsa deberán aceptala segundo se indique na resolución definitiva.

10. PROTECCIÓN DE DATOS

En cumprimento do artigo 13 do Regulamento (UE) 2016/679, do Parlamento Europeo e do Consello, do 27 de abril, relativo á protección das persoas físicas no que respecta ao tratamento de datos persoais e á libre circulación destes datos (Regulamento Xeral de Protección de Datos, RXPd), e do artigo 11 da Lei Orgánica 3/2018, do 5 de decembro, de Protección de Datos Persoais e Garantía dos Dereitos Dixitais (LOPD), informámolo/a de que os datos que a persoa interesada facilite mediante a concorrencia a esta convocatoria serán tratados baixo a responsabilidade da Universidade da Coruña (UDC), cuxos datos de contacto son: rúa da Maestranza 9, 15001 A Coruña, teléfono 981 167 000, correo electrónico <secretariaxeral@udc.gal>.

A solicitude dunha bolsa ao abeiro desta convocatoria implica a aceptación do seu contido e a autorización para que os seus datos persoais sexan utilizados pola UDC, de acordo coa LOPD e con fundamento nalgunha das bases previstas no artigo 6 do RXPd, coa finalidade da correcta xestión das bolsas. Todas as persoas que entren en contacto con estes datos coa citada finalidade cumprarán o deber de confidencialidade establecido no artigo 5 da LOPD.

Mediante a concorrencia a esta convocatoria, a persoa interesada consente expresamente a publicación dos seus datos na resolución da solicitude no Taboleiro Oficial da Sede Electrónica da UDC, na forma prevista na disposición adicional sétima da LOPD. A resolución desta convocatoria permanecerá publicada no dito taboleiro. Os datos persoais serán conservados mentres resulten necesarios para as finalidades do tratamento e, en todo caso, durante os prazos establecidos pola lexislación vixente, sen prexuízo do previsto en relación co exercicio do dereito de supresión e outros dereitos recollidos na LOPD.

A persoa interesada consente o tratamento dos datos para os efectos de cumprir coa finalidade descrita nesta convocatoria, e terá dereito a retirar o seu consentimento en calquera momento, sen efectos retroactivos. Ten dereito a solicitar ao responsable do tratamento, en calquera momento, o acceso, a rectificación ou a supresión dos seus datos persoais e a limitación do seu tratamento. Tamén terá dereito a opoñerse ao citado tratamento, así como a solicitar, salvo casos de interese público e/ou exercicio de poder público, a portabilidade dos seus datos.

Estes dereitos poderaos exercer da seguinte maneira:

- a) Prioritariamente, a través do formulario para o exercicio dos dereitos en materia de protección de datos persoais, que figura na Sede Electrónica da UDC, <<https://sede.udc.gal>>, no apartado *Outros trámites*;
- b) Mediante unha solicitude por escrito ao responsable do tratamento dos datos (UDC, Secretaría Xeral), dirixida ben ao enderezo Secretaría Xeral, Reitoría da Universidade da Coruña, rúa da Maestranza 9, 15001 A Coruña; ben ao correo electrónico <rpd@udc.gal>. Tamén se poderá presentar esta solicitude a través do rexistro telemático da Sede Electrónica da UDC ou nos rexistros presenciais da UDC.
- c) Mediante unha solicitude por escrito dirixida á persoa delegada de Protección de Datos, ben ao mesmo enderezo postal anteriormente indicado, ou ben ao correo electrónico <dpd@udc.gal>. Tamén se poderá presentar esta solicitude a través do rexistro telemático da citada sede electrónica ou os rexistros presenciais da UDC.

Así mesmo, ten dereito a presentar unha reclamación ante a Axencia Española de Protección de Datos (AEPD).

A política de privacidade do Banco Santander pódese consultar no seguinte enderezo web:

www.becas-santander.com/es/legal/privacy

DISPOSICIÓN FINAL

Para os efectos previstos no artigo 45 da Lei 39/2015, do 1 de outubro, do Procedemento Administrativo Común das Administracións Públicas, esta convocatoria e os sucesivos actos do procedemento a que atinxe, cuxa publicación se determina nestas bases, serán publicados no Taboleiro Electrónico Oficial da UDC.

No lugar e data que se indica na sinatura dixital.

A vicerreitora de Estudantes e Empregabilidade, por delegación do reitor.

(RR 10/07/2024)

M^a José Lombardía Cortiña